







天啓壬戌會試恭謁定慶二陵記

臣仁錫萬曆丁酉所取士也年十九初謁主試  
訓讀書是以殫於讀先臣允堅登乙未進士令  
浙江諸暨調繁崇德隨任六載事無鉅細悉令  
肄習是以殫於吏臣父勤其官卒又十四年祀  
名宦耐煩經史思學易年三十五從師焉是以  
殫於易己未歸厭苦作文字庚申神廟賓天  
臣痛參養數十年哭於郡八月十四日裹一月  
糧往西湖越明日聞光廟崩哭於湖卽日歸



臣詩云小臣一滴西湖淚灑盡先陵未肯乾又  
云何必寢園皆種竹六橋風雨泣成斑臣荼苦  
自知耳臣始欲出明年游天台鴈蕩一百日歸  
憇台州府驚聞渾河之役張帥督東浙兵力戰  
死三江閘人臣馳疾騎四百里叩其家母老子  
幼想魂萬里臣所至謝剝蓋特爲二將啓卹亡  
何明詔優之恨不能身列戎行愈欲出臣之出  
也適已未詞林姜前輩坐臣齋強偕計遂擬應  
試試竣謁 二陵則杜戶自休三年來甚踈筆

硯拈一題想之不得而前輩復遣書敦速其書  
言臣有心漢子宜置金華殿中行矣再以高華  
員美贈臣感其意復勉爲制舉之文乃竣試於  
壬戌虜孔熾士卒乘城大風揚沙臣不顧望昌  
平道中逕行謁拜是爲二月十有八日



神廟寶訓進呈恭紀

恭惟

神宗顯皇帝以聖神文武君臨萬邦者四十八載禮樂備而聲教彰府事治而詠歌作蓋在初服以法

祖親賢勵學勤政爲治本屢見于 齋居屬對

及牙牌所書十二事具括經世之要又因誦

大寶箴謂人當以虚心處事迨久而表春秋尚其斷也釋衍義務其大也赤虹紫電弘開震夙



之祥玉簡金繩式增太乙之筭風行四海粟支  
九年璧馬未荐而安瀾山川懷柔以震疊當其  
時嚴 大閱堤歸仁 賜田租 罷織造 絕  
加派 賑荒飢誅貪吏太倉之粟陳陳而營伍  
精嚴廐馬充斥西自嘉峪東至山海崇墉密雉  
行萬里不持寸兵大都定算于 廟堂而決幾  
于 神智遠左不戒蠢爾王杲縛獻 闕下及  
奴黠累請款關質子嘗試災聽力持弗許厥後  
劍出而星辰皆動飲至而

宗廟式寧或成靈武之功或底玄菟之績禹甸  
載闢于西川漢印終歸于南詔嗟乎一張一弛  
文武之道立國之根本在德澤而每與一朝之  
法度相御而行

神廟踐祚冲齡懲毖積玩德澤非靳也然每載  
于法而使人凜旣而令行政舉吏習民安嘉與  
天下游蕩平之路法度非軼也然每渾于德而  
令人忘明徵定保盛德大業至矣哉詩云儀式  
刑文王之典日靖四方是紹闡之極思也史臣



仁錫奉

命較閱

寶訓稽首敬述

執中用中說

自執中之訓發於堯而舜益以危微精一三言  
子曰用其中於民故作中庸溯堯舜以來相傳  
之意云上天降衷於民有恒性無非中無非民  
也聞六律五聲八音在治忽以出納五言中之  
在民猶真氣之萌黃宮無稽弗詢凜凜聖讒蓋  
無以淫聲奸律殺亂正始哉察邇言其猶察聲  
律也堯嘗以是察舜矣詢事考言察之以言事  
釐降媯汭察之以二女故黜陟幽明分北三苗



問察之極也豈直黃帝之問牧童伊尹策土功于偃者眇者以爲下其耳熙其蹟哉執中如執衡非持於衡之所不設用中如用權非運於權之所不在權衡必於喜怒哀樂未發之中矣未發之中天下大本達道民之中也說者曰堯不誅四凶非也胤子朱囂訟放齊不知堯知之靜言庸違象恭滔天驩兜比奸堯知之方命圯族羣臣不知堯知之有鰥在下廷舉之堯先聞之且試之夫啓明之朱不可以君則決舍之而不

疑側陋之士稽於衆則舍己之子以從人而不易其一瞬此大權衡之所在堯謹持之用其中于四岳用之於民也用其中於獨斷亦用之於民也若共工鯀特在試事考功之列使其罪狀早著堯自誅之不待舜矣四罪而天下服舜之殛放也卽堯之殛放無他舜所執者堯之中所用者堯之中堯舜所執而用者民之中也夫中立於過不及之上而莫之偶超於善惡之先而形氣莫能蔽蓋利欲之蔽可解形氣之蔽不可



解是以不危人欲而危人心娶塗山辛壬癸甲  
呱呱弗子非人心最迫切者哉而九載績用八  
年荒度仁孝之痛昏墊之瘵道心莫微於此擇  
於君臣子父之際何其芒忽不精胡一不擇胡  
執雖謂危微精一未嘗加一語於執中也可當  
其挈大寶以叮嚀一曰天之曆數在爾躬一曰  
四海困窮天祿永終舜命禹無易辭則是中也  
者天之曆數莞於斯四海之命脈係於斯帝躬  
之喜怒哀樂衷於斯夫中而渺乎忽乎如雲將

之間鴻蒙則已若其曆數命之威儀動作以定  
之四海旁矚之而上有不虛無告不廢困窮聖  
神文武之君提誨之執玉捧盈不敢不執牖民  
孔易又甚易執隨執隨用要以皇躬不愆四海  
其乂而止蓋嘗溷木石居之偕鹿豕遊之決江  
河納之不必挽不中以歸中而執中微矣用中  
而執亦化矣惟執中不與以已故能用其中於  
民非民也乃天也堯欽若昊天曆象日月星辰  
敬授人時舜在璿璣玉衡以齊七政事天明事



地察此執中用中之大原也今不悟曆數之在天威儀動作之在躬困窮之在四海而第曰允執厥中又不悟舜之命禹詔儉勤邦家者何心不自滿假者何心敬修可願者何心禹之創慢遊傲虐朋滯於家而荒度土功者何心第曰危微精一何以領其相傳之意哉故曰君子中庸庸用也用費也費而隱不可不察歸之大智其不執一而執兩也試思命龍聖讒命夔典樂命契敷教命棄播谷命臯陶作士何以宸斷也乎

哉疇若予工若予上下草木鳥獸何以諮衆也乎哉能典朕三禮能奮庸熙帝載何以咨四岳而養民則咨十二牧乎哉宇宙明晦止此是非是非止此兩端舍兩端無中可執亦無中可用是其所是非其所非賞一人千萬人喜罰一人千萬人懼千萬人之是非不混以一人之是非而一人之是非遂能定千萬人之是非用天地日月鬼神吉凶之奧是謂用其中於民舜曰隱惡揚善易曰遏惡揚善順天休命止至善則惡



自消非有善無惡非見善不見惡而有以隱之  
過之是執中之大力也然後可以承天曆數常  
精常一執中則乾用中則時乘六龍以御天天  
且弗違豈僅能用人而已哉舜一聞執中而咨  
二十有二人惟時亮天功禹一聞執中而苗頑  
弗卽工一乃心力誕敷文德誠用之也無一息  
不用斯無一息不執而要以欽明爲本蓋堯惟  
知人能官人安民而後四海有所恃曆數有所  
歸不知人則民不安知人不官人則民亦不安  
故曰能哲而惠何憂驩兜何遷有苗何畏巧言  
令色孔壬審若是其執中不啻執玉捧盈而凜  
若蹈虎尾涉春冰也哉則用中之極軌欽明之  
心法也



大器猶規矩準繩論

夫大人者先天天弗違所以範圍天地之化而  
不過後天奉天時所以率繇禮義之極而不愆  
天地亦器也然而謂之大器則以天地不自大  
其象形而俯焉受範圍於神易夫天地且範圍  
於神易而豪傑不受範圍於禮義是天之棄物  
也何謂器夫神無方易無體何不以有方體者  
範圍之而以無方體此後世拘執之學與權變  
之學俱廢而大器獨尊乾之剛健中正純粹精



也入一權而雜矣坤之直方人不習無不利也  
入一員而欹矣不失其正獨稱聖人正大而天  
地之情見正者理無不端大者氣無不之則靜  
正而不禦也所以爲規矩繩者也是以一介之  
精密纖微之忖度豪傑慎焉天地寶焉聖賢爭  
焉非爭於咫尺之能守而爭於咫尺之能動非  
爭於咫尺之守處能動而爭於咫尺之動處能  
守兩儀旣分南乎不可北若夫意南而南意北  
而北失之遠矣雖然後天八卦何以盡舉先天

而翻之將雷風山澤水火自翻天地乎抑文王  
翻天地之局乎夫六子不能翻也文王不能翻  
也天地之局固自翻也夫天地翻天地之局而  
不知聖賢翻聖賢之局而不知乃奸雄一翻聖  
賢天地之局世以大驚彼有常儀的此無常儀  
的雷風恒君子以立不易方恒不於水火山澤  
見而於雷風見是規矩準純常立於雷風者也  
太極也何以不曰天地有太極聖人有太極而  
曰易有太極天地聖人不欲標太極之名而悉



聽之易小心之至也神易也天地之小心卽天地之大器凡人不能托乎變化患其不能變化變化者天地之體也天地以變化爲體方員平直以不可勝用爲體用其用而體不動用其不可勝用而體無窮不失管子一用之而動再用三用竭矣器之小也孰有小於一用而竭者哉彼亦欲治人也方之不能方員之不能員枉不就直側不就平猶夫鼓之不雷噓之不風者耳然則管子之令行於齊也何居規矩準繩蓋常

一用之內政矣其才非不大其救時非不急其招携懷遠未嘗不嚴整然以有過之軀事多寵之主瑕慝實見於桓公之身夫以誠意正心責桓不猶塵之飯乎哉孟子豈不知齊宣何如主而必窮搜其好貨好色之根引之至道寧所以爲方員乎直者在人主有不驗而所持之規矩準繩不可失也有所不用而不可勝用之用自在守在咫尺動在咫尺動而守亦在咫尺故能奉天時然後天弗違不曰奉天体曰奉天時者



師天地之象形則不足師天地之精神則有餘  
精神者卽其範圍天地無方無體之極故規矩  
準繩天地與聖人之大器也大器非特探賾索  
隱鈎深致遠而已必立成器爲天下利故在一  
身爲規矩準繩器之小患驕吝費則去吝之病  
隱則去驕之病唯儉與禮可以守之管子能費  
不能隱故不疵其不費而疵其不善費彼所守  
者太公之舊法也然太公亦有過焉况師其意  
者而失之歟器不一至於調停而最陋夫乾一  
之斯一夫坤二之斯二倘二之而不能二則一  
之而非其一是以嫌疑之義發於坤上謂二三  
之岐千百之轍皆從二起也噫去已而禮去情  
而法去兩可而一是去俗例而舊章可矣斯神  
易在手矣



詩

調陵

壬戌二月試竣以儒冠謁

陵

碧城十二倚芙蓉絕漠遙開捍虜功  
北極紫微瞻儼在西清黃繖夢難通  
香沉宿雨楸梧冷翠捲朝烟澗壑雄  
報祀獨知今上切蒼然秋色滿關中

其二

龍宮直與北辰連紫翠中藏不夜天  
四塞河山



凌朔漠二儀風雨積幽燕雄關勢屹宣威遠寢  
樹聲閒約夢還獨倚深林渺然意忍看秋草茂  
陵烟

其三

萬仞蒼崖鎮百蠻龍藏劍璽扼天關仗移幕殿  
香猶在人去春林鳥亦閒玉帛星馳歸禹貢衣  
冠嶽立侍仙班漢家原廟松楸古樹樹清風響  
珮環

其四

疊巘層巖護碧叢九天香霧日濛濛明樓雪影  
晴初散御沼冰花暖欲融風勒未追黃澤馬月  
鈎猶掛鼎湖弓孫謀喜奏昇平頌萬國咸歸孝  
治中

其五

寂寂玄宮積翠圍路盤鐵壁倚崔嵬雲移鶴夢  
歸瑤島地湧龍光燭上台朔氣下清胡遠遁靈  
風時動仗初回丕承丕顯光謨烈直挽滄溟薦  
壽杯



恭謁

長陵

景陵

獻陵

三陵當紅門之中

樓觀中天矗登巘蒼雲宿長陵當至尊兩廟拱  
深麓哈岬巖虎蹲陸離劍龍伏永言仁孝思風  
露三峯木

恭謁

裕

茂

泰

康四陵

四陵翼長陵之西九龍池環其前松園逸其左

落落園松風清清九龍水陵宮鬱嵯峨迤邐西  
山紫庭燎昭四代圭瓚仍千紀用缶章甫冠從

容問樽簋

恭謁

永陵

長陵之東天壽山相近悼陵合葬于此

玉璫琉璃闕靈宮日月間松深聽猿嘯峯高見  
鶴還 皇澤弓劍合 朝儀聞珮環蒸嘗新命  
善天壽卽呼山

天壽山

世宗新建圓亭留額

翠輦經遊處留題

御墨香嶽容尊祖宅靈脉



接孫芳新閣飛辰迥長松宿雨涼登臨占王氣  
雄峙鞏金湯

恭謁

定陵

煌煌新寢殿恍與 聖明面袞龍香未消簾簷  
稷初薦孤臣淚色鮮原草千行茜爲頌闕宮詩  
罔極 三朝眷

恭謁

慶陵

神龍不可招重光忽如電 聖人方照臨求賢  
廣封禪崦嵫夕以陰珠丘詎忍奠愁揚結哀雲  
珠淚集維霰

恭讀

世廟冊諭

議禮崇先祀 皇綸玉屑霏宣威清塞角蠲賦  
恤民依百代 恩猶渥二儀章並輝儒臣追  
聖眷燈火照寒帷

昌平古意



驅車幽燕道平原覆荒草雄圖燼已颺王氣雲  
全灑千山箕尾間長劍星斗皓雉堞麗淵嶽行  
行杼遠抱

狄梁公祠

伏鑕回唐祚牝晨不敢鳴礮震塊軋潜涕定  
台衡蘚碣霜還粟虞淵日自明千秋餘正氣豈  
獨祀幽并

劉諫議祠

布衣修諫草直節並梁公憂國心昭日鋤磨筆  
有風鱗嬰劉向逆詞抗比干忠草野瞻山寺昌  
平一故宮



附

謁

陵紀聞

昌平道中

賊在牆外一面嚴行收斂一面徵調各兵或積薪或鈎杆使之一無所試賊若潰牆一面號召諸將一面牽其進止或劫營或擊惰邊堡固當加謹而境內州縣尤當預伐其謀邊兵固當練而各處民兵尤宜及時教習



不獨秋防而冬防猶不可忽不獨晝防而夜防

尤爲喫緊

隆慶勅旨

祖宗雖並設九邊而于宣大遼東尤重故東置山海關以限遼東北置居庸關以限宣府西置紫荆倒馬關以限大同故問刑條例一居庸山海守關隘口引送口外邊衛逃軍過關并守把盤詰之人賣放者俱問發邊衛充軍又凡問發直隸延慶保安二州爲民人犯但有在逃俱行提問罪改發

古之屯田者軍也無事則耕有事則戰故屯不常恃今之屯田者餘丁也餘丁則管屯田軍人則管戰守故屯可常恃夫屯可常恃而邊餉稱不足者何也屯額原少也

各邊該發年例銀兩必俟邊書奏請方爲題給又拘于取盈糧至數百石草至數千百束方許告報以致奸商價騰若米自十石以上草自百束以上俱准告報此正與預開鹽引之議同各邊馬匹原無關文草束事例自嘉靖三十四



年議十一月至四月每月馬暫給草十束五月  
六月給貼料銀三錢年豐罷給查邊儲文簿獨  
有甘肅一鎮載秋青谷草秋青草歲積至六百  
六十八萬五千九百一十八束而糧料則八十  
萬七千以上因巡撫楊博經理積累所致初不  
盡出于歲運而部額緣以獨省他鎮不能可見  
興利在人

遼東有納草贖罪例大同可倣行

設拒馬以制衝突虜勢險而節短五步之內長  
兵技竭後短兵不備被衝卽窘拒馬者攜壘以  
行而兼車之用

利莫利于弩自神機之技出猛烈便利蓋十倍  
焉永樂以來弩遂廢近神機愈出愈奇如地槍  
五子數百步及快槍二子亦數百步并佛卽機  
毒火諸兵又出神槍之上矣

火器莫過于大將軍薊一年止放一次以勢大  
人不敢放也銃身一百五十斤以一千斤銅母  
裝發葉夢熊改銃身爲二百五十斤其長三倍



之約六尺不用銅母徑四尺于滾車上發之可  
及八百弓內大鉛彈七百爲公彈次三斤子彈  
又次一斤爲孫彈三錢二錢者二百爲羣孫彈  
名曰公領孫以鐵磁片用班毛毒藥煮過者佐  
之重廿斤可傷人馬數百若沿邊以千萬架而  
習熟之真絕技也運之以車登高涉遠皆宜國  
初出塞專恃神銃爲破虜先鋒天順六年造兵  
車各有載大銅銃車成化元年造各樣大將軍  
三百個載砲車五百輛會典神槍神銃俱內府

兵仗局掌管其慎重如此葉公有新製滅虜砲  
運以滾車打放一發可五六百步鉛子總一斤  
公又製輕車其言曰成化車一輛十八人宣大  
十冊薊鎮見存曰偏廂曰飛車非十五人不能  
駕自古興兵十萬用輕車二千皆越險數千里  
近製雙輪前向遮板稍後上列刀鎗六把佛郎  
機二函火箭三層手上百子銃一函輪輕有自  
行之勢假二人推之如飛可翼以新製鐵拒馬  
竹挨牌砍馬刀平地二人遇險四人抽壯健以



駕輕車其竹挨牌與百子銃鐵拒馬須用南兵  
方敏捷

張學顏巡撫遼東車營率依李文達公車制長  
一丈五尺高六尺五寸前後左右橫排槍頭謂  
之脚城遼陽二百輛用皮縵輪轂增列火箭神  
槍二層可與輕車並運

蚩尤刀戟大弩此戎敵長技之始軒轅用指南  
車破之此中國長技之始

右賢王遠居度漢兵不能至是不意也飲醉是  
不備也大將軍夜至圍之可謂出其不意攻其  
無備

渾邪王與休屠王等欲降漢上恐其以詐降襲  
邊令去病將兵往迎之渾邪王裨將多欲不降  
者頗遁去去病乃馳入得見渾邪斬其欲亡者  
八千人遂獨遣王乘傳先詣行在盡將其衆渡  
河號十萬故虜欲襲邊多詐降卽真降而中有  
不欲降者擒斬不可已 國朝常茂斫元將訥  
哈出傷其臂正爲約降而中悔也



青出塞先以武剛車自環爲營且將兵五萬止  
縱五千騎繞單于得以靜制動之意

李廣射殺胡人射雕者匈奴以數千騎衝百騎  
下馬解鞍以示不走有白馬將出護其兵射殺  
之而復還至其騎中解鞍令士皆縱馬臥故先  
碎

虜弓矢遇雨筋膠俱解此太宗所以潛師遇雨  
而出卒致突厥破膽尋盟而去

孟德聞馬超益兵則喜知其內竭也今各邊聞  
警竭諸軍以赴之不蹈此失乎

成弘敵臺懸樓大同月濠長塹城塞之始也然  
臺樓太疎壕塹易塞垣周于壕墩附于垣近年  
事也固原酋馬池之傳箭境門宣府往來之蘆  
蓆山麓乘塞始也然傳箭多失夜警蘆蓆不禦  
風寒步兵登垣馬兵列營亦近年事耳

虜矢石懸簾禦之竿棘鈎斧禦之斗牌懸石禦  
之革洞衝木火筒禦之又恐其肩土袋挾束草  
千萬成羣內薄以逼填壕附垣以大銃口懸簾



以護陴也陴之不存石及之也陴之不守矢及之也石及之爲陴可免矣矢及之非懸簾不能免也○木矢發多不直聞有反射者易以鉛子出直而疾中入而深

宣鎮據天下之上游當五路之總會城周廿四里有奇牆久且卑總督王之誥巡撫冀練經營修築今于隆慶二年始五月二十一日終九月十四日原議作四年修理一年一面錢糧六分四年運發今成功之速如此共節省原議一萬

四千餘兩南山東議長壕二道斬崖鑿梁議外多挑壕崖共長一萬八千二百十三丈二尺五寸柳溝管一座長一百八十丈二尺西關廂牆一道長七十五丈六尺西南角敵臺一座設修石墩十座水口土墩一座火焰山中石牆長二百二十八官房四千六百七十八間衙舍等七百八十五間又新題烽堠墩八座沙河水口墩四十四座石圍一千二百個俱石壩長一千四百二十六丈六尺○懷安萬全右衛二城鎮



城既完遂續修之二年關廟廂墩臺五十九  
軍民自備及取諸捐銀納例○懷安萬全右衛  
城堡關廂墩臺一百九十六處座營房三百三  
十四間

三年

鎮城所屬堡 鷄鳴山驛 上西路所屬堡

新開口 下西路所屬堡 洗馬林 南路所

屬關廂 順聖川 西城南東路所屬堡四

榆林驛 黑漢嶺 沙城

東西二

十路所屬成

堡三 龍門所城 鷓鴣堡 龍門衛城中

路所屬邊牆 青邊堡 予按俺答之款誠天

幸而隆慶諸公將相督撫之能如此故備載之  
宣府西有紫金水馬水之援必俟南山無警遠  
者十餘里近者六七百里如總兵駐劄保安延  
慶州副總兵駐赤城永寧遊擊駐劄左衛岔道  
東路游擊駐劄懷來四海治專護南山聽候入  
衛固美至紫金水馬水等處皆保定鎮巡地方  
舍懷延而趨紫荆懼虜之乘虛矣虜既入境各  
路叅將畱備東路且東北二路密邇屬夷如薊



鎮虜犯昌黎復有牆子嶺之變可鑒也

陵京拱護在南山一帶而機要尤在獨石一路  
爲之耳目小則撲捉哨夜及燒荒人役大則東  
犯灤薊南窺陵其長水海子正白草三間房  
之巢穴自大捷後重鎮允賴總兵馬芳叅將劉  
潭屬夷史二官兒等功也

二一年一月

初年止舊遊兵一營後添設新游兵營嘉靖廿  
九年又添入衛游兵營三十六年又添專護南  
山本路遊兵營名多而兵少今南山已添兵八

千設叅將一員將入衛游兵裁革併補新舊二  
營招兵及將東路游兵一移駐鎮城召補三千  
之數南山有警俱聽疾趨南山東西有警卽東  
西往來應援閒嘗不出鎮城與各營一例不許  
坐支行糧料草

二一年

正奇兵二營係保障宣鎮

及有警馳護京師之兵新舊游兵二營係每年  
輪流入衛薊鎮之兵東路游兵一營係專防陵  
寢之兵馬匹皆不可缺

共缺九千四百二十六匹

已將萬全

都司官庫京運馬價朋合椿頭肉臟銀共三萬



五千四百九十六兩每匹十二兩已收買三千二百七匹太僕寺存留馬匹所以備國家之急也請于寄養馬內解發 二年

河南春秋兩班宣鎮備禦官軍八千一百餘員原無盔甲器械老幼逃絕數多每年空費在家糧二兩二錢到邊六個月又支行糧布花銀二兩三錢有餘合每軍定二兩一錢折班價一萬七千餘兩又免支在邊行糧一萬八千餘兩存留在邊或召募土人或修築公費量免三年

西路極鄰虜穴無險可恃以戰爲守始因虜衆圍軍困軍夫于鎮河臺逐之出邊繼因虜衆特放馬匹于白海子勦之使解散軍夫之圍

北路關係陵京南路統轄洪蔚皆虜所垂涎

米粟豐盈人心樂中本鎮糧商已上納糧料者數多而歲給引目甚少除額引外再增主兵淮鹽五六萬引蘆鹽三四萬引客兵淮鹽八九萬引蘆鹽六七萬引或將額外多增之數就作下年正派之數惟以運糧入倉爲準聽其搶先上



納陸續出給實收填給勘合倘糧料集而不售則商之資本必虧資本虧而難繼則後之轉輸必鮮惟驗米而給引不必據引以定數

南山一帶設東路游兵一營駐劄懷來春秋兩防總督駐懷來撫臣與游兵一枝駐防鎮城若虜東行宣府總兵官駐延慶副總兵移駐永寧東路游兵移駐四海治大同總兵官移駐陽和游兵二枝一駐天城一駐懷仁山西總兵官移駐蔚州老營游兵移駐廣昌北樓叅將援兵移

駐渾源虜若勢向獨石三間房白草川等處不待調遣馳援南山以故數年分布既嚴聲勢亦壯今總督改駐陽和聲勢漸減

一復東路游兵仍駐懷來一免入衛薊鎮游兵一預調山大游兵山西駐舊保安大同駐新保安有警聽撫臣調度

一復礦兵以固衝隘南山隘口數多秋防調蔚州防礦兵三千各自備器械續因罷調今總督駐陽和去南山甚遠仍宜調礦兵一千五百名



分布隘口戍守每名支客兵糧一升五合月給  
主兵米五斗五升

宣府一鎮主兵月糧布花等項百餘萬兩屯田  
不過七萬三千三百九十六石論者謂屯田一  
清則邊餉可足是豈理哉均屯不如均糧屯地  
失額已久不如使前七萬三千三百九十六石  
俱有著落是已清查則人多不在撥補則奪人  
所有不如前數俱要實實完納是已照部議以  
一斗爲止而隆慶三年以前舊逋盡免之每戶

給與紅票一張以見在人耕見在地至本鎮團  
種徵糧稍次于屯田是亦屯田之類其初官撥  
軍自種後因軍不暇給官之牛種難繼遂廢其  
事今皆撥與餘丁領種原額三萬八千二百三  
十三石零亦照前規查出短少拋荒之數除豁  
亦以今見在地爲主以一斗爲則餘行減除以  
上二項田地少糧多改于地畝糧內加派徵補  
一本鎮功臣香火新設新召原額地一千九百  
九十頃此四項原非國初之舊故不給軍皆餘



丁人等私下承佃納糧內功臣香火近始改爲軍儲者也或占據于勢要則曰功臣或投獻于寺院則曰香火或因其拋荒而召人開墾則曰新設新召今各仍其名色但計應納糧石亦照屯田團種法以一斗爲則

一本鎮地畝起科新增牧馬等項田土俱軍餘自行置買并用力開墾故原額三萬一千四百六十八頃六畝今比原額多七千八百七十九頃一十二畝茲屯團之原地所以失額屯團之

虛糧所以爲害至有地無糧彼虧此盈今削去名色俱作地畝照上中下分派北路最苦寒稍爲寬減南路頗近腹裡量爲增加東中西三路在南北之間應仍其舊欲于前項并屯團功臣等既請免徵二萬四千九百六十三石仍欲于實在應徵九萬三千八百一石內量賜本折兼派除本色米豆中米上納其折色照依月糧則例八錢一石者卽納八錢七錢六錢亦然本鎮合用本色止是征哨官軍每年約八百石今地



畝共計一十二萬餘卽備凶荒尚有四萬餘石  
蓋下等不但地利不同其天時四月迤後氣始  
融和七月方終霜卽凝降不但天時不同其農  
事辰巳時哨無警騎方敢荷插轉未申時頗有  
風色卽巳驅犢還壘地利如此天時如此農事  
如此更有不測之憂又勢所必至者

國家雖有增糧之名

嘉靖十一年一十八萬四千五百二十五石二十四

年一增三十四年一增四十年一又增

倉庫絕無增糧之實今斷

以十一年數爲準其餘除豁以嘉靖四十一年

加徵虛數二十萬九千四百九十八石較之北  
平少損以隆慶二年徵完實數一十三萬七千  
三百八十六石較之猶涉太多

本鎮國初的腹裏僉軍每軍給養贍地厚者二  
十畝三十畝薄者四十畝五十畝原無徵糧軍  
糧將地報官每分徵銀有一兩二錢者有八九  
錢者容原衛所爲答應公費有軍士貧乏將前  
項捏作地畝賣與富豪有畝無糧以已之薄易  
人之厚久皆迷其處所甚非因田制賦之義矣



今宜徵糧以補屯圍之額

挿以款愚我將士受之我以戰愚挿挿不受也  
喜峯口進貢是何言歟讓路以與奴又以貢道  
自與非自與也還以與奴也其逐西虜非報仇  
也欲合東而先仇西絕我之疑也故挿離我之  
形遠而敵我之情近挿意不在奴奴意不在挿  
而皆在我遂出其不意而孰知大凌河之後必  
有登萊之事又必有上谷之事彼二虜獨不顧  
世有明眼人耶亦終必亡耳張家口之馬不至  
則取諸秦土荒餉缺兵弱籍空積貯補伍選將  
最急慰撫屬夷擇其怨者與之深謀實做暗做  
緊做拭目俟之



昌平道中二

初尚書林公瀚議升爲州領懷柔密雲順戢三縣逆瑾不從復降爲縣謫公叅政瑾敗仍運隸入衛而中設天壽山守備一員統攝之叅以州治差徭養馬悉與優免昔郭守敬引白浮山之水西折而南經甕山入積水潭以通漕運予所過詢父老斷橋流水守敬遺跡猶有存者而元時積粟餉兵以名其山又如一畝泉東合沙河經陽山由高粱直趨張家灣皆漕道也若起



無夢園集  
白浮村至清龍橋延袤五十餘里元郭守敬所  
築以障雙塔神山諸水使東南流入潞河以便  
天下漕運蓋居太行滄海之間其地重矣東門  
外有松園備陵樹之缺嘉靖二十九年虜直抵  
東山口陵衛之衆無一執挺籍京營撥守紅門  
東西兩山口叅將陳燦把守東山口律人馬損  
傷大半賊大入幸我兵潛伏松林中奮出大獲  
竒捷是年被殺虜人丁五十名口所存三千餘  
丁耳今見存止一十六里里甲宜倍恤云

文皇帝封山曰天壽前鳳凰山後黃花鎮左嶙  
山右虎谿東西山口兩水合流于朝宗河環抱  
三十餘里山雖起自崑崙然而太行華嶽連亘  
于西山海以達醫閭逶迤于東唯此 天壽山  
奠居至北正中之處 京師建四方之極 天  
壽山位京師之上爲天下主山以崑崙爲源以  
太行醫閭爲翼以滄漠爲岸鞏華城四券門如  
午門之制以奉 聖駕云國家控扼西北二虜  
每要害之處必設關堡屯兵積糧故延慶衛昌



平州白洋堡黃花鎮榆河驛五處各有倉廩時  
乃粟芻歲遣六部主事或員外郎一人監其出  
納蓋如次如庾矣居庸關在州西三十里跨南  
北而夾兩山水傍崖流徐中山壘石爲城作  
京師北門特建衛學叅將分守而入達嶺南北  
咽喉于是移居庸把總蓋營房以居之其北黃  
花鎮距州八十里實 皇陵之玄武山又北鄰  
四海治界限華夷松楸茂密

世宗盡除鎮守內臣獨留此鎮至四十年巡關  
黃紀疏彈裁革永不復設大都陵寢以黃花鎮  
爲重黃花鎮以四海治爲捍謂之山南舊有小  
道以通往來然而永寧懷來之人咸知捷徑矣



詩

出山

初入翰林言志

垂髫耽閉誦三十始從師茫然大夢中學易出  
險巖築居額潛確出入稟皇犧有味卽爲慾無  
求長自怡獨往心不疑乾坤自構基古人不可  
見始亦爛紛披天山畜其德充棟無乃卑弱冠  
談經濟時艱凜躊躇爛然東壁星倘亦照瘡痍  
良農無越畔力學日孳孳

及第言志



蒼壁臨春早上書充庭禮樂集簪裾雲門古奏  
諧膠漆神駿天閑響璆琚豁達推賢求海內風  
霜自保省蓬廬艱難從古摠心膽肯續長楊賦  
子虛

其二

劍珮晨趨謁九天鳴鐘深省立爐烟人惟求舊  
推儒宿詔以拔尤引閩仙宸翰入霞鮮曉日  
彤墀分仗耀金磚香車流水迎歌吹獨醒花間  
早着鞭

其三

瑞雲叢捧日華新天鏡高懸荷特掄喜沐深恩  
陪侍從緬懷臣節在嶙峋萬方送喜歌天保千  
古除克靖虜塵肯使至尊獨盱食雲雷無處  
不經綸

萬壽朝賀恭遇瑞雪

凌晨嚴駕喜趨陪宮殿霏微映早梅綵勝自緣  
龍藻結仙花非爲剪刀催山山環架連雲巘樹  
樹交飛行慶杯知是丹青畫不出天機織素待



宸裁

其二

百靈嵩祝出雲端海湧銀濤上露盤不夜光隨  
圖鑑上因風細和珮環珊珊斯干似續丕基壯在  
鎬雍熙 聖澤寬俄看揮毫成五色天章先許  
近臣觀

其三

孔雀徐開金鼓撾來同萬譯徹幽遐共含 聖  
酒旌旂露齊放陽春劍珮花宮殿恍疑天作柱

銀河又見海浮槎九莖蓮葉芝房草挹露晨光  
上紫霞

其四

九霄清樂奏韶箠雞唱文昭報武成乍剪瓊花  
舒帝澤欲爲春水滿天聲能攄赤膽擎瑤柱卽  
有蓬萊在玉京百鍊臣心冰雪苦朝衣一振覺  
寒輕

其五

屬車臨幸肅朝常疊鼓聲高漏漸長染翰先書



天保句爭春惟有雪梅章山河指掌青于髻臺  
樹參差玉滿岡俄見幅員天海貢裝成玉壘壯  
巖廊

講筵紀賜

山呼遶殿祝長春太室披圖氣欲岫玉映黃流  
開壽觥白浮紅友煖書茵擎來禁苑天杯重捧  
出金華聖酒淳賜鏹石渠同序拜錦函開處又  
分珍

其二

雲近蓬萊月倍嘉乾坤照徹湛光華日南海靜  
無求寶陽羨山深只貢茶瑤島碧桃皆結子赤  
霄白玉盡開花侍臣分得天漿醉金鑑燃藜絢  
彩霞

其三

華夷同賀 聖明君宵旰懸知帝學勤金殿集  
賢開寶鑑天厨饌玉剪雲雯鼎彝芬芍三漿美  
魚水調甕六膳芬杯錫上樽思論道堯天捧日  
映龍文



其四

河清萬里 聖人生嶽貢彤雲抱日清箸借漢  
家籌上筭膳分周鼎奏和羹層霄寶契圖呈瑞  
飛閣迎祥滿引觥東壁光華澄少海 前星皎  
共 帝星嶸

金華秋講

祐啓貽謀弼直匡手書二帝與三王文華纂要  
尊經法九五銘齋引弗康日麗欣逢三晉接天  
溫近捧一謙光牙籤點簡儒臣事蓮燭高懸一

夜湘

秋講賜宴

人直鴻臚拜手颺橫經無處不飛香羹墻警蹕  
迓欣格天步龍光仰穆皇 特召初傳帝輦下  
不名三荷玉音揚大庖鼎戴 天言重宴罷紅  
雲捧 藻章

進春賜鑑

帝苑春來心早知池魚躍水似新窺雲連蒼巘  
將成幄鳥入花箋欲上枝若起青蘋來白雪漸



舒弱柳布金墀乘龍迎淑頌恩早猶戀寒光獻  
論思

其二

九日春光始馭羲天顏有喜近臣窺青錢不媿  
無雙價白璧何慚有四知未許梅花爭艷雪憑  
將素質勒丹彝上敦節儉裁予賚論道偏分少  
府奇

其三

和風協律引初陽芸閣來青曉氣蒼不共游鱗

戲輕藻肯隨剪綵狎韶光賜從吁咈春先到殿  
繹繩糾弼直匡 帝曰俞哉汝作礪大川終擬  
濟舟航

菊始華律

寂寂園林綴曉霜獨餘叢菊領孤芳幽姿乍欲  
霏秋色嫩葢纔堪逗晚香小睨碧雲金鎖甲微  
酣朱露玉沈漿肌癯貌古色深秀笑倚西風傲  
紫黃

其二



秋老幽叢翠葉加曉欄霜冷爲催花蘭蓀未解  
通芳意蜂蝶無媒覓絳葩露欲浥容斟玉液風  
先迎馥上金華悠然不盡南山意擬向天杯泛  
紫霞

其三

孤根獨自表秋餘露濯清光意半舒幹老常含  
太古色芳鮮偏與世情疎豈爭扇後歌聲出偶  
傍樽前花鼓徐采采食英盡多事蒼然孤翠滿  
空虛

其四

一種清真別有家兼葭月白足生涯空香無語  
微含露秋水爲神也着霞未許春風催後騎聊  
隨烟雨濕初葩依依遠景明寒素茗欲香時籬  
欲花

其五

試問花開何所似山中高士骨清癯三更淡語  
何愁雨一篆清心只共爐未嫁東風自貞女若  
逢桃葉應花奴玉堂笑撚枝相問堪並深巖有



宿儒

菊始華絕

翻爲花開暗自驚  
月高風靜夜何清  
未堪桃李歌姬妹  
且付茱萸插弟兄

其二

綠烟沈盡清輝發  
歲寒自有雪霜旌  
試看肅序花纔放  
猶似秋天不肯明

其三

最笑人情皆向菊  
那知冰骨獨辭榮  
讀書細把

殘燈剔靜數花開  
第幾莖

其四

悲笳不隱催刀尺  
籬落何心染錦紈  
邸第樓臺茵似積  
花神未許與凡餐

賦秋得菊有佳色

青霜變林葉慨然懷秋思  
瞻彼籬下菊幽叢露華滋  
空谷有佳色素心寄一枝  
欲寄不能寄獨酌月已移  
修名各努力殞落紛蓬茨  
何以食靈藥茹荼苦自持  
萬形有凋謝烈士挺艱危  
獨向



朝陽立靈均淑其儀古人欽晚節紛華淡若遺  
南山佳日夕抗言賞其奇森標似求友開牖林  
蔽虧白雲知所好含笑迎朝曦清風送餘善晴  
芳足幽歆冰雪文一卷避俗自堪携庭樹感榮  
落清真此白眉動搖山水影苦吟不知饑廊落  
星與漢冲襟高步宜擎以金掌露敬上栢梁辭  
美色幾時好非爲拔異姿永言保勁質天公豈  
爾私

其二

千冬遲一春玉堦畏春草譬如賢達交偶然淡  
相好白雲自堪移乍見深懷抱閒向秋月開不  
倩春風掃因風入錦茵矜重綦與縞流水漾桃  
花啼紅怨開早江頭冰雪多水仙亦潦倒粲然  
心理綿芳鮮色不老偏與靜者宜秋深林自擣



詩

削逐

放逐湧紀時天啓之丙寅也

寂如蕭寺不談玄夜半挑燈月滿天夢到家鄉  
先問竹香携朝袖只看山

其二

謝飲關門豈獨醒春山采采手烹茗二毛不爲  
勞生白雙眼時從展卷青

其三

寒風蕭蕭和書聲月白霜高天水清入直必稱



爲堯舜閉門依舊習書生

其四

海雲讀書江浩漠洗菜枯僧目炯炯朝罷歸逢  
挑水入直教身在焦山頂

其五

偶然騎馬忽稱官錯認袁安是謝安賭墅只聞  
棋子落東山倘許學邯鄲

其六

家居官長半相知別後音書一字無不是書生

傲徹骨開函真廣費踟躕

其七

兀然一似守枯株官舍家居事事通寄語家僮  
休使勢逢人下拜早輸租

其八

初學灌園手自鋤支扉片石老迂樗縱然刀鋸  
侵吾舌不作天邊一紙書

時魏瑄以不草鐵券將構予大獄

其九

一判玄黃不必疑浩然自得寫新詩卽教瓶罍



無儲粟肯嚮他門立片時

其十

門前葑水斷塵喧常住蕭蕭無夢園怪底出門  
太多事夢梅夢竹夢分蓮

其十一

父母生我不好弄十齡徹夜吟寒凍如今頭白  
一無能何事紛紛苦迎送

其十二

駐馬看山我友同別來馬上又相逢有時不速

三人至笑似青山添遠峯

其十三

雪花開似淡娥眉斜灑佳人知不知最是擁書  
消夜永凍雲宛似未開時

其十四

門前無雀可張羅兒子書聲和我歌倒屣不迎  
天下士芥芽沙水鞠躬多

夢父

游荷單恩未乞封涓埃無補愧遭逢先臣世食



嘉禾藻夢見慇懃勗在公

夢母

計偕別母僅經年臨去可寧謝賻錢外氏素封  
廉不取捐奩佐讀却分田

其十 懷仲弟和卿

問君何事絕賓筵有第清竒似古賢邗水方舟  
評古楊子期一去忍安絃

其十六

故人百里訪吾園隔水書聲坐短軒散髮不知

客竟去伴來憐我欲忘殮

第蹇自長安日啖峨眉笋餅

北固山前蜀老僧廿年笋餅舌峻嶒可憐煮法  
渾不記又向同人問水蒸

其二

細嚼清真素手搏欲將笋餅比龍團春山攪破  
茶花碎肯把龍孫貢漢官

其三

何須入口慢尋香一見渾知道者妝漸老漸熟



真平淡就中樗拙許誰嘗

其四

餅煮西川竹萬竿瞿塘山色若堪賒斷崖滴水  
光疑乳茗椀浮香浪潑花

其五

纖纖手摘瑯玕髓貧道山中貯缶盈他日乘濤  
萬里去峨眉山半雪中羨

天啓丁卯辭朝

一天明月懸朝鏡兩袖清風帶芥茶古榻幾章

無長物故園容有未開花

四月十一日三更抵舍忙尋小圃果餘花

潞河待舟逢楚友周更生却之不去

招招舟子在何方回首君恩憶拜颺開函家

語飛吳越衝雪同人遡澤湘湛露只今霑小草

素袍猶喜被天香尚餘毛髮酬明主敢負生

平空泌洋

潞河夜宿

中宵夢入金華殿欹枕驚聞潞水聲去國不知  
因底事身輕一葉總君恩



詩 題贈

贈丁大司空存問

世臣那得似君賢  
廊廟江湖一後先  
天眷長城宵旰日  
寵新盤石耄期年  
路車乘馬龍光顯  
赤鳥綏章綸綽宣  
纘事登邦四海望  
申公疊疊烈無前

辛未秋七月予與同年陳贊皇奉使周

秦遲我于順德路見三公子喜而湯賦

樹樹村烟綠邢侯有故宮  
天邊持節下客路正



秋中萬里瞿塘遠一宵樽酒同函關紫氣近浮  
白咏秦風

其二

著書空往事雲日起新編擾擾干戈地閒閒桑  
拓田君平莫問卜渭水早乘船天半峨眉雪吳  
門亦渺然

其三

如春注關隴 聖主急匡時放馬耕蘭塞浮杯  
醉鞏池苦吟珠唾落珍重素心知家世忠仍孝

道傍玉滿枝

傳寄菴年兄以冊封 周藩行

長安草色曉鳴珂駢駢勞人四牡歌太史授圭  
開赤社宗藩如帶指黃河中州風土殊無異右  
席詞名更若何知君舊擅靈光賦上客鄒枚應  
未過

送史念翁太守

琴鶴蕭然過虎丘祇携廉石駕虛舟欲攀遵渚  
須臾宿賒取太湖三尺流秋月尚籠蓮漪碧海



玉未放翠霞收相看此日留公意盡入長江作  
水浮

其二

柷鼓揚船曙色開慙懃叙別悵行盃前旌初唱  
歌驪曲天意還須補袞才新水喜添河朔飲錦  
城重借范韓裁忽聞門外催詩者盡道慈雲送  
雨來

時苦旱

其三

大夫直節舊家傳誰數風流常白賢鶴俸不支

影倍瘦花陰未掃酒如泉行藏豈向天工問休  
戚還勤民瘼先去轍難留徒惜別歸裝胸次兩  
蕭然

劉司理振賢課最

祝網能仁喙息忘毘陵旋見報賢良嘉禾遍覆  
三春雨驕莠驚鋤五夜霜海甸遙馳恩渙汗綽  
綸初錫袞衣裳刑平高陟清華近詔直承明捧  
御香

其二



漢廷共說蒲鞭吏獨有江南雨露私杞梓舊饒  
三楚地謳吟新遍五陵兒詔從禁闥龍光燁名  
滿江淮草木知飛璽淑人滋愷悌褒黃古道頌  
恩斯

李蒼巖年兄以推關行

金華勤下 詔書寬捧檄慇懃撫字看司計肯  
教疊代耻淡交只聽缺空彈江南極日凋萑蒿  
塞北何人擣賀蘭官舍寒山一水耳鐘聲如沸  
半江來

其二

浙直七月朔日風疹附訊

賜羅初泛菊花罇壽母斑衣手樹護袖滿清風  
心似水峯高大石竹爲食珍竒罷貢除商推榜  
棗傳歌識 上恩風伯有心排 帝室使君先  
爲訪寒村

贈余大理致仕

漢家匏子上書誰借問二疏知不知自有謨謀  
通帝座何勞車馬數江湄前村深雪尋梅處谷  
口重雲待客時最是赦除新奉 詔廷平所至



播陽曦

送黃石齋偕徐霞客游洞庭時旱禱

我家太湖連東溟笑殺吳人多不識送君直到  
消夏灣手挽天河瀉震澤十隻畫船泛樂天扁  
舟今乃私遷謫白守不如君也豪逐客相隨一  
霞客逢山得地龍浮春見月知天空與連憑君  
賒取三尺水以耕石田釐豐年秉炬先游林屋  
洞不須貌取隔凡天但見大蝠撲炬來衡山八  
分如畫戒淘沙小舟差可方峯峯懸燭光華燦

紗帽山林皆債也未許君還山水債授此竒方  
忤救人好將湖水街頭賣

記余遊洞庭無弗酣適尤愛石公龍嘴吞吐  
若林屋蠃行耳出洞後竟夜思倣淘沙船錦  
纜前導懸數十炬于金庭玉柱間可臥而游  
也

贈江南諸分闈

余戊辰所舉士

憶昔欃槍掃遼左狂胡夜警甘泉火蠹茲蜀寇  
復匪茹生靈百萬瘡痍累是時 朝廷思右武



募檄交馳出樞府射鳥小兒拜期門牧羊賈人  
賜爵土紛紛爭覩獻前籌寂寂誰同

天子憂六郡良家擐越練三河壯士礪吳鉤爭  
道鴻毛輕任使共祈龍額早封侯諸生本自渥  
注種軀幹精強萬人勇授得家遺馬服書雕弧  
手挽三石重維歲改元之戊辰

聖主當陽布化新八方耆定四夷賓大蒐巖穴  
羅師貞材官額解集神京我時甲乙司其衡試  
牘三千識爾名筆底俱揮小范兵旣饒果決况

能文氣凌鵬鸚橫秋雲史書傳業同彪固投筆  
而今獨羨君

天子臨軒爾曹眷命以總師清海甸說禮敦詩  
儒將風赤膽懸胸赴公戰黃流穩貼遁鯨鯢碧  
草翻搖戲魚燕幕府他年總第功爲報江南今  
海晏嗟我東南民力殘樓船將軍未飽食脫幘  
嗷嗷殊可慮市租仍復盡輸官若使篔簹投大  
海應得迴波變紫瀾往年建虜誤于款依舊秋  
高獵騎寒今年西賊浪言撫人傳蜀道尚歌難



薦章願達明光殿拜將早築黃金壇

送沈方平年兄助教改官南儀部

之子錢塘令雙高健翼騫大堤橫野市孤鶴嘯  
長天吏朴看山古鴻飛任弋牽辟雍方論道別  
意又揮絃

爲韓君理孝廉索贈崔侯

平山花縣望銅陵江上空濛潮正生况有青陽  
磨政碣何殊松嶺作濤聲片雲催雨新詩麗洲  
渚圓沙寶色珍直上天門書蹟最荊州萬戶盡

逢春

送廣文令楚

邁心玄曠任鴻絃見說居官不好錢仗劍湘江  
雲滿路決渠甘雨湧如泉未須崔令學陶令自  
愛山前映水前吏散庭閒矯獨立懷人秋水在  
長天

懷江伯通世兄

生于諸暨嫁于長洲江侯寄先嚴諸暨訪西  
施尺牘也余與伯通晤荆溪未幾突弁余且



老矣

生于諸暨嫁長洲記得慇懃訪雪舟  
玉女潭中照我老雪濤閣上聽君謳

何孺龍

論友誰如子超然似月流  
枝神不用藥興至任傾甌  
倚劍陵三島高歌嘯十洲  
願言解瓊佩携手上丹丘

何嗣冲

薄遊逢勝侶置我狄籠中  
上藥清如水丹崖氣

欲龍青囊珍舊業玉樹發新叢  
一笑滄江上相思月滿蓬

壽陸觀叔母八十

千古有機雲世閤燁雄超而有聖  
善模才名天壤俱綠筆徤秋鷹  
錦囊壓奚奴伯氏怒搏風五色  
正歲莛矯翼西南天流彩于羅  
施政感神雀榮名垂碧雞單騎  
藐郭令威惠在裔夷鼎分大官  
餉捧檄喜可知歸來拜阿母熊  
丸敢忘之萊子舞宮羅抱孫佐  
潘輿南山賦樂只何必減華



胥君不見吹雲和鼓靈虛三花琪樹鬱庭間忽  
聞青鳥瑤池使啣得墉城玉女書書中已授靈  
飛約相期盡人間樂玳筵急管醉莫辭遲爾三  
山駕鸞鶴

壽海虞孫恭甫太尊人

憶翁壯得志倜儻能文章揮毫寫秋色眼底天  
茫茫家多渥注種白眉矜最良一朝蠖爲龍果  
勝步兵狂咳唾出珠璣半落奚錦囊宏詞對大  
庭除目注銓衡西曹趨拜璽三尺倚持平出爲

交州牧逶迤擁雙旌抗潔懸魚去承恩露冕行  
咄彼五斗賊化作千長鯨血吹海波立高天闢  
崢嶸白骨爲丘山草木殺氣腥書生爭叩馬父  
老前挽輪云是妖氛垂前途慎勿輕聞之怒叱  
馭指髮上填膺拳帷遂茫止時驚鐵漢名戰守  
預所儲賊聞徙其營魁殲蒼痍撫攬轡已澄清威  
惠流三魯三府告厥成特簡叅行省借寇慰蒼  
生早識髡鉗禍寧愛冠與纓決志占肥遁秋思  
入蓴羹超然評論外身與世俱榮翹翹旋歸滅



殊恩感 聖明節移蠻府鎮諸生藍輿迎海曙  
雲封岫春暖閣晴駢駢皇華轡啣命出羊城  
士庶卽攀戀其奈迫王程假道省阿父喜賦日  
初升床頭新酒熟朝來扶宿醒椎牛晏鄉里倒  
屣接公卿矍鑠哉是翁蒼頭且返嬰住世作地  
仙閉戶學談玄廣文耽吏隱十載舊青毡喜色  
迎朝旭春風徤暮年萊衣宮袖舞幸子一經傳  
梧竹鷓鴣棲阿閣見朝儀出者慶來章處者頌  
黃籬請看百粵地龍象生光輝

壽李大生年兄祖九秩

榜中李兄年最少芳鮮日糴陳言糴有祖仙壇  
稱幼仙十六漢宮女窈窕黃金養賢不買笑春  
來瑤草供詩料偶然五柳榮冠簪風雨欲來蒼  
龍叫著書得意忽自笑安車蒲輪勤上詔鴻濛  
併氣天水平神虎風雲總一竅日月之行天爲  
棹船如天上坐雲嶠爾孫黃閣翁黃髮天開奧  
府德彌邵

壽朱太常上翁年伯母



燕喜新歌壽母年鸞章遙寄五雲天錢塘千樹  
花知笑瑤島三珠鳥欲絃焚券耻隨市義後襲  
讐忠向荷戈前巍佗象服河山靜香滿霞卮歲  
歲鮮

其二

遊子承恩侍禁闈高堂華髮照春暉介圭更渥  
新花誥補袞仍懷舊綵衣帝日遠開湘水麗卿  
雲長繞楚天飛一床冰雪婺姑共寶婺祥光拱  
太微

蔣八公年兄老年伯暨陳恭人雙壽

身惹御爐香滿卮十齡獻賦森玉枝山川出雲  
誕申甫天作之合自關雎始令江山欽父執追  
呼不聞罷稅訾九清鹿溪瑞鵲繞梁石於今碑  
去思餘米不以耗雀鼠倉官一命沃京坻北新  
如市臣如水白壁高馳最度支擢守溫州盜夜  
縛不聞刁斗方舉醺暫移江右之東粵仇殺四  
崗弁自貽檄下罪人皆反接欽州單騎牛酒嬉  
崖黎自與銅活隙何事漢官驕舉師日入欲歸



日出主種人傳告路致詞蠻夷貧薄願長壽公  
揭肝膽誓不欺強駐徐聞傳降箭受降僞獻義  
釋纍少留方寸仁五指督餉海崖戢狼夷撫議  
抵牾亟賦凱功成三月撫遺耆岑球正法旋止  
調昌樂肉飛報蚊蠕建縣不如多築堡索金別  
駕徒擾之殛貪妙簡沿邊吏解甲鼓篋舞羗氏  
豸史白功疏親老智才節烈褒母弓令妻壽母  
子登第天壽平格方期願筦鑰惟謹宵征肅膝  
前第見螽斯嬉四知皎皎旦復旦賢母特贈雙

鶴隨 社稷上臣需戡定如公一出勒鼎彝坤  
貞世有徽懿嗣邀取滄溟獻壽卮

壽桃源江萊翁夫人

夫人生于江右先生  
官于吳蜀

三世仙源筆有花種花香雪動春涯簪玳曳縞  
襄廉異洞口飛桃錦渥洼吉水天連湘楚濶長  
洲色映劍川霞白華孝子秋皎皎寄語司花鼓  
急槌

壽何宗元年兄母夫人

南山高唱傳臚句手摘瓊花帶雪芳旌詔乍俞



牙史奏 恩綸新入鳳池香帝庭玉樹文章貴  
仙島靈護歲月長四十年來課子意早看彝鼎  
在冰霜

壽陳襄宸侍御年兄

好看佳候及朱明况喜薰風入侍清霜指西臺  
呈峻潔星當南極表精英東方自不言仙骨長  
孺非徒著直聲聞道滇中花盡綺四時還覺似  
春生

徐雲林年兄出跡海道便道壽母

長憶孤忠炳劍門婺頌光老九龍森客臺壯業  
莊猶墨壽母長春室是諷闕北雲天稽綵服海  
南夜月引芳尊知君此去稱觴處僊棗如瓶近  
可飧

蓋卿弟初度

魚蒲龍節使星過我在中州子渡河遍插茱萸  
酬令節獨携松帶傲烟蘿年青小阮逢初度頭  
白詞兄樂寤歌漢義二疏恒止足傳經還勝積  
金多



題張義姑芳閨俠骨圖

一生那問標梅老閨閣從容長鳳鷁是母依然  
貞不字呼兒歷盡苦于荼雙懸日月光兄妹隻  
立乾坤幟丈夫逝者可生生不媿濡毫風雨寫  
賢姑

其二

謂他人父是吾兄玉樹青霄駿有聲不識人間  
共衾穴早看掌上秀芙蓉辛勤抱子如已子蹟  
藻吾翁卽若翁母以子旌仍義女在原急難碣

懿蹤

輓金水部浮弋

水部清如水虞衡課最還賜金初日下埋玉已  
人間劍去龍猶躍玄成室已關素心誰與說落  
葉滿秋山

其二

生別猶牽袂死能不涕漣招魂惟有宋作誄自  
哀潘吟苦收殘淚曝書拂舊箋傷哉如泥輩清  
徹有誰傳



輓莊方壺中翰年兄

蕭疎風雨故人容茅屋藏書雲半封  
葛藟勤將根本庇鵲鳩鳴向石磐  
宗濤飛肝膽明于雪影落寒空氣  
尚龍看劍此宵還未挂鑄君三鳳  
赤芙蓉

輓門人計我瑛

楓落吳江哭故人清溪携手在城闔  
石田伴月添君影背口招魂問水濱  
戰苦陣雲移海嶽騎成箕尾躡星辰  
青蒼博古雲霄異千尺琅玕長

玉筍

其二

終日翻書手自耘我于宦興薄如雲  
門前不少問竒轍寂寞從遊獨有君


其三

那知天意獨憐材何事雪深苦立哉  
聞說黃金臺已築乘濤萬里莫疑猜

其四

僧寮廿載對霜寒風雨時將劍一看  
肉眼何人





缺 P48-P50



相國士多君携酒醉江干

其五

風塵歷落賦崔嵬書幌空餘隔歲苔忽聽鳥聲  
驚客至門前獨有我瑛來

其六

語君一事最堪書我葬天機其紹居旣誌二僧  
將誌子三生石上吐芙蓉



郊天頌

有述

臣稽洪武元年正月四日設壇鍾山之陽

昭告

上帝皇祇定有天下之號曰大明建元洪武先  
是雨雪陰沍四月朔旦雪霽越三日省牲  
雲陰悉斂日光皎然暨行禮天宇廓清星  
緯明朗禮成遂卽位于郊壇南臣扈

聖駕幸

天壇



上諭鴻臚卿戒不恪諸臣皇恐稽首謝是日  
風屆祭登壇萬籟澄寂與朔日霽雪正陽  
踐位萬古同符初洪武

命凡行郊祀禮以天下戶口錢糧之籍陳于  
堂下祭畢收藏內庫其天下城池山川地  
理形勝亦皆圖而藏之以見拜受民數穀  
數于天之義又見天險地險王公設險朽索  
馭六馬其難其慎之義而

郊祭之牲養于別室躬親滌養不與山川之  
牲等洪武二十年春正月壬子朔甲子大  
祀

天地于南郊禮成

上曰所謂敬天者不獨嚴而有禮當有其實天  
以子民之任付于君爲君者欲求事天必先  
恤民恤民者事天之實也即如國家命人任  
守令之事若不能福民則是棄君之命不敬  
孰大焉又曰爲人君者父母天地子民皆職  
分之所當盡祀天地非求福于已實爲天下



蒼生也

皇上敬

天法

祖稱謂不敢並尊正位居體世則世法 嚴諭  
銓選守令二千石以京朝官爲之其以恤  
民之政修敬天之實者乎

皇建中任賢能文武用顧畏于民巖我哺我  
乳髦士奉璋鰥寡以不侮懷保小民佑我  
烈祖神具來駿惠溥申錫無疆袞衣勤補

皇建一章章十二句

露雷風雨

天之教日月明江河流綏兆民多福乃亦有秋  
以似以續乾剛坤柔率作興事殫乃心力  
絕優游幅幘旣長萬福來求

露雷一章章十句

我將我享旣戒旣平百職安其序輕徭薄  
賦懷民氓有虔秉鉞俾居圉不驚萬邦惟  
正壽考且寧保後生



我將一章章八句

昔在洪武大祀

南郊禮成悅豫惟德孔膠天開霽色風息其虩  
豫順以動誅貪殛然天錫祚胤松茂竹苞  
在

帝左右萬年 家室地天交

昔在一章章十二句

步禱天壇雅

有述

粵稽 吳元年

高皇帝因久旱日減膳素食 宮中皆然既而

雨羣臣請復膳仍以苗稼焦損不允

皇上齋宿 文華殿浹日累月先是 詔罷

織造節儉爲天下先斥言利者勿庸清明  
在躬至德馨聞于蒼穹辛未夏旱 步禱

一遵

神祖仍 步行還 宮止回 鑾勿御齋宿如



初 旨下之日霖雨兆祥漸而霑沛蓋臣  
又稽 步禱令儀

高皇帝于吳三年嘗行之矣二年旱告祭風雲  
雷雨嶽鎮海瀆等神十八壇中五壇親行  
禮爲祭文以告願神以民物之疾苦聞于  
皇天后土三年又旱乃素服草履徒步出詣山  
川壇布設藁席露坐晝曝于日中頃刻不  
移夜臥于地衣不解帶凡三日始還 官  
仍齋宿西廡給各官紗絲一萬四千餘疋

給軍士例外荒米令法司決獄復命有司  
訪求儒術之深明治道者以聞天遂大雨  
上近法

神廟溯源

高廟永世克孝而一時釋纍臣嚴貪殘渙汗有  
明徵云

天步臨雲霞起蒸蒸其心 朕躬視朕履乃  
眷四海此維與宅八郡佗負牽勤祝史寧  
丁我躬嗟下土之耗斲矣



天步一章章十句

衣大布之衣與天語圭璧以陳滌滌其俎  
予一人之讐驚鴻哀鴈罔失所畏天之威  
靡敢駕六龍森禁籙無恒安處矧其曰鞭  
雷霆呼羣公先正之莫我許

衣大布一章章十二句

存心錄成 景命篤祐駿惠  
聖明爲天下父掃除兇慝媿烈洪武盛德若  
虛無罪無辜籲疾苦赤土民勞庶

上帝之無怒何以溢之其雨其雨又何予之謀  
臣雲而猛將雨

存心一章章十四句

告子 嚴父 昊天疾威下民有嚴

帝命式于九圍亦趨亦步先天弗違盪濯雰慝  
天且弗違

告于一章章十句



社稷壇頌 有序

臣聞大社大稷分祭配祀

高皇帝初如前代之制而後乃更建也命中書  
下禮部詳議合祭證諸洛誥社于新邑及  
封人掌設王之社壝註云舉社則稷從之  
壇位考周制起大事動大衆必先告于社  
而後出在中門之外外門之內尊而親之  
與先祖等社主之設或以石或以木今擬  
共一壇設木主而丹漆之祭則設于壇上



祭畢收藏仍用石主埋壇之中而罷勾龍  
與奔配位奉

仁祖淳皇帝配

上善之爲撰樂章想神來于祥風以康軍民時  
雨暘而又頒其制于天下成一代令儀焉  
洪武三年溧水縣以牛醢代鹿醢御史按  
實奏之

上命有司究其罪諭曰溧水固有鹿何得謂缺  
有司無誠心于祀神而敢爲是苟簡也夫

一邑耳勤御史白簡罪一人以安社稷其  
嚴如此臣列陪祀肅將祗歡兆民永殖敬  
賡昇平之頌云蓋不邊暇食以四方惟正  
之供視土辨色尊而親之矣

六龍以御天萬靈齊頰首穆穆皇皇真氣  
到林藪嶽修貢川效珍五色紛縕映前後  
六龍一章章七句

練時日神哉沛羽毛紛先以雨

帝臨中壇繩繩垓宇后土富媪制數惟五遺



秉滯穗各得其所

練時日一章章十句

通乎晝夜霆聲發榮土膏脉跂行通甫田  
茂豫迪成肅雍兆民反本抱素其同

通乎晝夜一章章八句

且復旦兮燭不夜襲乎鼓之軒乎舞之卿  
雲爛兮堯獨憂之

且復旦一章章五句

和治諸夏萬民平均神之來兮雲景杳冥

雨暘以時人告其心靡方不勤敬明尊親  
和治諸夏一章章八句



太廟頌 有述

粵稽洪武

上命禮部鑄銅人一高尺有五寸手簡書曰齋  
戒三日凡致齋之期則置朕前庶朕心有  
所警省而不敢放也當是時

上親製樂章入

太廟徘徊桐梓因感鳳陽

陵樹灑然淚下粵我

光宗貞皇帝聞



月夕壇陪祭僅六人

嚴諭曰

郊

廟大典豈容褻慢至是自今陪祭臣咸宜恪守陪禮其無故不與者指名叅治太常卿疏請修

郊

廟禮儀宜先期整理者六事

貞皇帝曰俞速行之我

皇緝熙敬止紹庭陟降陳常祀受

命溥將臣忝廁

經筵駿奔奏其敢有瀆辭

明德恤祀作之君允師罔不配天其澤

聽念于

先王若彛則不敢宿耆壽俊在諮蠢爾戎索黎民阻飢尚寧幹止昭假遲遲有典有則予思日孜孜

明德一章章十句



皇之先天克配世其勤作邦作對迪見冒聞  
靈斯欬餉奚以侵兵奚以諱法奚以持平  
吏奚以取愛顧瞻四方如耳

先王之息胤百神河嶽秩秩奚在胡寧忍予庶  
無罪悔

皇之先一章章十六句

綏予孝子駿發其祥有震且業弗祿爾長  
肇禋右序無怠無荒遂開皇極誕受多方  
爵人于朝惟德是量

綏予孝子一章章十句

保明其身示我顯德行慶雲在天孝孫有  
慶金玉寒氷剛健中正時純熙矣從諫惟  
聖

保明一章章八句



幸學雅

有述

臣恭繹洪武

詔書天下通祀孔子凡府州學田租入官者  
悉歸于學增師生廩膳

諭禮部尚書劉仲贊曰孔子明帝王之道以  
教後世使君君臣臣父子子綱常以正彝  
倫攸叙其功準于天地又

命禮部製大成樂器以頒天下儒學

勅禮部禮樂圖之盛典必貴協和毋圖速成



有乖製作又

諭古樂之詩章和而正後世之歌詞淫以夸  
蓋協和之訓與速成之戒淫夸之防一道  
德同風俗至深遠也又

諭嶽鎮海瀆混加封號瀆禮不經而止系山  
川本名忠臣烈士悉依初封實號惟孔子善  
明先王之要道爲天下師以濟後世封爵仍  
舊蓋慎重而定制故協和而成功先是禮臣  
具

幸學儀以請

皇上諭遵洪武令典臣忝侍從扈

駕五更見五色祥雲繚繞與諸臣環立橋門  
觀之

作禮樂而乾坤光華集大成而日月巍煥都  
哉俞哉

帝念下土芒芒肇開上庠曰六經是常博士孔  
揚授書瓜瓞以祥功臣彭彭忝爾子弟無  
怠康殘元淪夷羗衣冠禮樂荒御史簡賢



良濟濟國學迪北方洪武永昌

帝念一章章十二句

渡江躬祀首先建學祇德行嘉周太祖之  
下拜遑職位是程昇端人作模範咨爾宋  
訥宿學宏大學人材本勿剽記誦竊其聲  
師陽城以克孝敬哉蘇胡教版平經義治  
事嚴且翼純粹以精我

皇式克承爨其臣願學心正意誠

渡江一章章十四句

六條炳天日太學教化源遼海阻東徼若  
箕子若管寧聲勿謏布彰

聖武哉玄菟并六師於鑠在泮獻馘息游魂  
以莫不震疊億萬年

聖子

神孫

六條一章章十句

聖謨洋洋薄文辭勅吳顓沃其本根繁須  
翦官師得人式敬爾典廣額奚以爲日居



月諸庸不勉我

皇養士如嘉禾有分可積勤止 輦

聖謨一章章八句

受小共犬共交趾是跂服賜視滇南萬里  
軌轍至爰製冬衣爰建病埴并炊給役徒  
藥餌之暇惟時肄維我

皇整經籍建右廡將樹射圃定爾志鳳凰鳴  
矣于高岡五色雲中

天爲識

受小共一章章十二句

孔子作春秋處事決疑川海赴

聖祖諭諸生咨爾立政如撥霧惟堯舜是權衡  
斥詐力崇寬賦公父文伯母也賢不知孔  
子慚當路佑啟

聖者興改謚文忠時勉遇天生人才  
王造之尊六經依傳註

孔子一章章十二句

洪惟



肅皇幸學啟明且教之誨之提耳灑 宸翰禮

儀既成敬一作贊再告孔子淫袞震憚

神廟繼之傷春秋斷爛之半表章麟經與衍義

補書而呈 講案

聖懷謙謙誕登于岸日月貞明天地貞觀

洪惟一章章十六句



